

彭

城

集

三



彭城集

劉放撰

彭城集卷十六

五言長律

章武殿

歷數歸真主。乾坤仗義兵。南夷長後服。下國怨西征。麋鹿荒吳苑。梯航聚易京。春蠶那恃力。朝菌欲長生。雷雨隨金鼓。鷹鷂起旆旌。靈旗概牛斗。白羽射欃槍。散地人誰保。連薨火徹明。晨門迎短箠。死斲斷長鯨。父老前流涕。農夫未釋耕。將軍薦牛酒。愷樂會韶箴。號滅虞何恃。崇亡紂亦傾。一戎終薄伐。再駕就昇平。舊邑更脩武。行宮卽顧成。奎芒垂篆刻。天質望氛清。羽衛嚴丹極。潮音接化城。欲回江海水。都作頌歌聲。

溪上

窄地穿茨拙。高城晚日斜。竹籬侵水面。溪女浣汀沙。老樹垂朱實。懸藤結白花。綠萍浮碎點。芳杜上新芽。一邑過千室。十金無數家。魚蝦與菰米。惆悵此生涯。

和裴庫部十二韻

懷人存蔽芾。招隱賦宵咨。賢傑多能事。音徽自不瑕。偶然新樸斲。一笑爲誰呀。夏屋已隆棟。清池非漚麻。

蟾蜍隨朔鴈。坐久至昏鴉。好事逢諸彥。佳聲播四遐。燕遊安以樂。詩語正而葩。霜應豐山石。灰飛河內葭。涼秋將落帽。斜漢挹浮槎。老木園岑寂。蒼苔積鬢髩。上聲影。瑤光天不遠。圭影日無差。莫怪長吟苦。良金出汰沙。

南征二首

漢皇開五嶺。虞帝事三苗。定有南征問。遙知用武朝。前籌皆廟略。選士飢風飈。淒水江湖大。雲山故國遙。天陰凝殺氣。師老聽哀謠。猿鶴愁君子。龍鼉憶架橋。繡衣方責戰。虎節竟乘輶。白骨不歸葬。冤魂誰爲招。猶傳發閭左。願得聽簫韶。旅泊時流動。何由問九霄。

揚越舊秦兵。苗頑尙禹征。初驚一使任。那用萬人行。友戶疑昏禡。滄波觸駭鯨。越裳無信息。銅柱定將傾。服嶺東南尉。戈舩萬里程。江通夜郎道。秋入伏波營。插羽頻封檄。馳輶屢請纓。介鱗悲物色。猿鶴恨民生。幾日封京觀。歸師捲旆旌。休聞七科戍。無用五陽兵。海國犀牛遠。南琛紫貝輕。平生一長劍。歲暮望樓槍。

寄橙與獻臣

清霜夜漠漠。佳實曉纍纍。鵲殼攢修榦。金華耀夙曦。狂醒香處析。痛渴味餘衰。採摘悲凡口。漂零恐後時。頌聲騷客誤。〔原註〕屈原有橘頌。錫貢禹書遺。惆悵生南國。煩君品藻詞。

酬臨濮劉推官

治民非己長。那得士心降。爲問來鳴鳳。何如止吠厖。壺餐慙鼎食。鉛割謝矛鏑。辯士更持節。佳兵正上瀧。

薄田桑十畝。小市釀千缸。自喜庭無訟。寧論智少雙。陪京開左輔。振鐸服中邦。禁衛分留印。天枝泣建幢。孤生老將至。壹意信猶扛。賴倚絃歌化。餘風勉政龐。

送賈士彥延平知光化縣

名家千里駒。富學五車書。柱後文無害。絃歌智有餘。素風存翰墨。陰德在門閭。江漢子男邑。穀城桑柘墟。曾爲都尉治。今亦萬家居。安穩飛鳬鳥。新鮮縮項魚。繡衣夸里父。壽酒薦親輿。不作期年別。看君就詔除。

送高麗使

絕域求通使。皇華益藉才。男兒萬里志。笑語片帆開。積鹵生陰火。奔濤起晝雷。曝鱗成島嶼。吐氣誤樓臺。城邑東迎日。居人學用杯。詩書自天性。冠帶及家陪。歲月如勤止。登臨亦壯哉。威聲逾肅慎。仙事指蓬萊。鵬向南溟近。槎常八月來。言瞻析津次。遙見二星回。

次韻和宋職方北樓

勝事略就手。茲樓無復加。棟梁宏可愛。丹碧麗非華。風月登臨最。川原眺望賒。斗城知日近。瀛海自雲遮。杖屨歡乘興。文移謹報衙。晝閒禽語靜。歲熟市聲譁。柳影重重幕。蓮香處處霞。舳艫隨渚遠。睥睨向人斜。話聽游童樂。詩煩上客誇。國風麟趾應。賓宴鹿鳴嘉。鵬鶚無餘力。麒麟不待撻。衰遲竟何補。襆被念還家。

復次前韻

仙游欺緬邈。古事厭增加。自我新形勝。因之翫物華。不勞工子勸。無價境天賒。雲構森如畫。顰飛勢莫遮。

靜看梁燕賀。閒聽野蜂衙。曹事初無壅。軍聲信不譁。倚欄歌白雪。爲客進流霞。快意涼風起。餘歡素月斜。吳趨應有始。齊難詎爲誇。夏日思王粲。名流得孟嘉。優游琴八疊。悲壯鼓三撾。遍看題詩語。飄然白一家。既和宋君佳篇。因取加字韻中所未用者。別爲十二韻。

板築廢已久。樓居仍可嗟。敢辭才不逮。何說智無涯。史例同新作。民謠異刺奢。棟梁虹夭矯。軒檻獸盤拏。萬室瞻華宇。千兵擁建牙。浮雲生柱礎。杲日透窗紗。明滅穿林水。稠重覆塹花。長空指去鷺。過雨亂鳴蛙。屢獲詩人賦。時紆長者車。薦觴凝縹白。諸語繆壺甌。隱吏容攀桂。終更遽及瓜。多慙雙鬢雪。蕭颯對文綯。合加字韻兩篇。二十四字成一章。更互次之。詠曹之士風。并敍出處。寄呈司年職方。

漢郡王封寵。周宗伯命加。犬牙基自若。麟趾歎于嗟。陵谷隨人世。春秋積歲華。洩雲餘蒼蔚。浮濟變津沙。端木倦游學。朱公精貸賒。於今富而麗。遺俗儉寧奢。使轍常交錯。京藩倚扞遮。鋤鉤非盜用。簫勺換兵拏。樸直叨三組。工夫盡兩衙。戎容剖符虎。士氣肅旗牙。園土幾無訟。虛庭不禁譁。對基銷白晝。清嘯岸烏紗。池館澄潮水。樓譙冠暝霞。綠梢簷外柳。紅朶砌前花。徙倚危欄峻。行來繚徑斜。巢林安短翼。擅壑愧跳蛙。夙昔未更事。游談多自誇。奏盈方朔牘。書過惠施車。臧室初縻迹。連城晚拜嘉。華顛看欲落。病齒不勝齟。珠琲輕魚目。桐絲陋馬撾。敢論雞似鳳。願食棗如瓜。臺妙前辭滿。安輿久臥家。最容高尚志。那肯待青綬。又十二韻

絕境可遺老。清心仍去邪。樓頭喧燕雀。川面動龍蛇。碧瓦浮煙素。朱甍麗日赧。倚風時坐嘯。乘月更吹笳。

庭樾交傾蓋。池房雜舞臺。涼秋乘爽境。吉歲驗汙邪。廚饌全欺魯。兒歌習陋巴。林珍餉桃李。溪飯列魚蝦。勝賞須神會。浮名祇盜夸。誰能貪課最。本自學禪迦。羈旅枝栖鵲。田園舍負蝸。蕭條看白髮。早晚得丹砂。

酬范判官喜雨

一旬天再雨。惠澤夜來深。震發雷霆事。榮華卉木心。問年如隔併。閱日屢辛壬。安水江千里。良田畝一金。劭農非有術。望歲忽爲霖。雝雝依青隴。跳魚出廢岑。夢成池上作。喜見洛生吟。破敵聯飛鏃。高張信雅琴。緒風開晝色。遲日媚花陰。更有資清興。連峯映碧潯。

赴官京東同舍諸公觀晉院見錢有贈并簡不至者

今日承人乏。東州假傳車。勞生復去國。垂老欲捐書。斗酒相爲樂。諸家食有魚。華燈續光景。鳴笛問吹噓。卽事已陳迹。懷人方跋予。要官多謁禁。數子莫情疎。啼鳥春猶淺。高花日勝初。朝回應見念。會語殿中廬。景德寺河沙院。錢蘇安上知泰州。劉元忠河北都運。分題得無字。

今朝一樽酒。聊與故人俱。非復少年日。深驚別意殊。燕雲低朔漠。楚水向江湖。報國不一事。出門成異塗。騰鱗安浩蕩。雋翼就虛無。應笑白頭老。閉關方據梧。

過太康縣此路入亳州云是先帝昔東幸時馳道也馬上口占行二十里成三十韻

維昔東巡狩。天王景宅朝。金椎隱馳道。象載下招搖。呂應青雲近。關迎紫氣遙。旄頭前詔羿。陪乘後征僞。率引三司肅。中堅萬馬調。旂常亂辰象。劍佩雜瓊瑤。多士和相讓。諸侯貴不驕。海神來積雪。仙馭會祥飈。

象帝初觀妙。猶龍此見譙。強名大樸著。將隱德音昭。上善泉仍潔。知常檜後凋。虛心明左契。聞道首參寥。絳節賓閒館。璇宮盛綺寮。洞天留白日。書法祕青霄。瑄玉嚴禋祀。歌童采夜謠。衆神如向座。佳氣鬱通宵。隴麥聞重秀。房芝舉紫苗。醴泉甘愈疾。舞鳳樂儀韶。舉翼王喬鳥。排雲子晉簫。頌釐知簡簡。奏賦欲飄飄。麗澤驚雷雨。鴻恩霈蓼蕭。百年皆就見。比屋幸寬徭。牧馬猶如隗。封人預祝堯。歡聲喧望幸。舊里不崇朝。萬域車書混。重明浸沴消。鼎成因脫屣。桑變忽觀潮。雲霧常疑祀。衣冠祇葬橋。藏書思柱史。問遠謬祈招。躍馬遵遺轍。談王就采樵。生遲千一日。無所效芻蕘。

次韻和石曼卿泰山

步至東山表。纔知嶽鎮尊。百川趨渤碣。一柱際乾坤。託始無懷氏。談更洛誦孫。後王崇檢玉。方士說天門。巖石居凝命。羣峯遠駿奔。陰陽殊雨霽。朝夕異涼溫。學者譏秦事。功臣誓漢恩。氣連滄海碧。影變濁河渾。候日來丁夜。捫星待合昏。仙真疑史闕。宮殿謹司存。落水雷穿谷。危松珀擁根。更尋宣父志。雅意屬崦嵫。將至洛中。先寄宋次道諸幕府。

頻年洛陽道。秋月照征車。關口朝煙上。伊川曉日初。艤船看飲馬。投策數游魚。蟬嘒隨林靜。鐘鳴應谷虛。夙齡懷勝尚。吏役久愁予。及此娛山水。翻知喜簡書。名都士淵藪。盛德世璠璣。驕旅如傾蓋。詹言興有餘。錢子高舉賢良中科。寄賀子飛。

當世英雄轂。連年伯仲賢。友于聲競爽。敵萬智無前。讜議天人際。馳辭日月邊。會驚文得鳳。眞謂筆如椽。

萬乘親前席。諸生敢比肩。晚成無近器。妙選悉青錢。濟美高陽舊。傳經韋氏專。公侯將必復。廊廟定誰先。步武青雲接。官曹畫省聯。軼羣看赤驥。洵直想朱紱。德賞今誰擬。才難古亦然。從容照棣萼。聞望已陶甄。夏屋方隆棟。雲檣穩濟川。那令得賢頌。祇貴漢王淵。

送裴二知蘇州

著書玄尚白。送客鬼揶揄。積水望江海。秋風吹軸轡。貴人千騎長。紫綬左魚符。遺愛留南國。歡聲接舊吳。曉霜繁橘柚。過雨熟菰蒲。安得如王子。從君飛隻鳬。

和原父同江鄰幾過淨土院觀古殿吳道子畫楊惠之塑像及顯僧傳當世貴人形骨仁僧鼓琴作。

真賞非俗嗜。雅游知勝緣。百身化前佛。方丈納諸天。工以智自表。名由高益傳。吳生擅粉繪。楊氏妙鈞鋌。能事古未盡。希聲今亦然。倅圖觀肖像。撫弔置鳴絃。理會均聞見。神交遺後先。衣冠若對面。山水欲忘年。子墨臺中妙。仙翁柱下賢。新詩俱絕唱。塵土更餘妍。

同徐監簿作水始冰

霜落歲將晏。風生水始冰。猶殘夏蟲怪。初比玉壺凝。氣襲璇源潔。光搖寶鑑澄。涵虛同凜凜。履薄乍兢兢。魚鱉悲潛伏。江湖息沸騰。淩陰如獻納。會是却炎蒸。

送韓子華奉使安撫江南

漢庭重八使。同日出東都。仗節年仍少。埋輪氣不孤。詔書敦直指。懸弩肅前驅。宣布君恩被。周爰楚澤紆。秋風捲旌旆。桂楫上江湖。遊子故鄉在。相思天一隅。

送張益宣州法曹

掾曹仁恕用。郎選孝廉爲。之子文無害。居廷敢決疑。一王除制作。三尺著毫釐。過眼皆成誦。讎書自所宜。
〔原註〕王君編前後制敕爲一書。最精。察廉時爾貴。治道吏爲師。去去弦歌化。當如別後思。

郊祀慶成詩

聖瑞歸文子。珍符屬〔原註〕音燭。孝孫。儲精凝景命。端拱輯羣臣。禮樂成中典。人神定一尊。亮章新物覩。咸秩備司存。盛德兼明察。彌文付討論。積高參斗極。因吉際乾坤。候景迎長日。萌芽發舊根。律風乘廣莫。卦氣起昆侖。闐闐開黃道。星辰拱紫垣。奉瑄嚴太一。推策本軒轅。八廟森重構。諸侯盛駿奔。薦馨光裸玉。告嘏速歸牕。旄纛羅千乘。旂旛徑九門。龍蛇影搖動。鵝鶴勢飛翻。士勇歡鳧藻。天腥候晏溫。幔城橫象魏。玉果會春園。嚴警連宵鑿。周廬次屬韃。望雲舒錦石。揖月上金盆。廣樂謹來格。升煙續載燔。頌釐如響答。終事寂無喧。輦路祥鸞轉。端門旭日暎。天雞還自舞。仙鶴爲孤鶩。河漢驚垂象。雷霆浹厚恩。晝衣期不犯。肺石更何冤。長樂尊無貳。椒房慶已蕃。睿心先廣愛。大策重臨軒。瑞典兼河洛。歡心極鎮藩。名山已望幸。天意肯周爰。願上公車奏。來趨白獸樽。心知摺紳義。展采詎難言。

次韻和王正仲熙寧郊祀二十韻

駿命膺長發。鴻圖本慎徽。八方星拱極。四海日升暉。舊典增咸秩。彌文示表微。聖時均玉燭。天統正璿璣。
南極迎陽復。陰泉候氣歸。積高常眷顧。昭孝每毋違。羽衛來雙闕。和鑾並六飛。風霆齊命令。龍虎會旗旂。
帳殿層城暮。金波列宿稀。嚴更虛夜鑿。雕輦下彤闥。廣樂千人唱。升煙萬日晞。衆神知受記。象物競來依。
陟降兼明察。圓方比範圍。送音仍嚮鬻。昇福想霏霏。霈澤蘇羣動。春陽暢瑾扉。慶深周揭厲。感極至歔歔。
多士參鳴玉。微生廁阜衣。肅雍瞻帝武。奉引近天威。儒館鵷鸞舊。長謠錦繡輝。因知子雲賦。何足頌巍巍。
聞蜀中大水。寄閬中諸弟。

蜀嶺參天近。巴江向海迂。百城同暗谷。獨鳥視前途。六月蒸雲甚。長風驟雨俱。漏天疇得補。深峽不時輸。
回首蛇蛟鬪。傷心虎豹呼。劍關愁斷棧。天漢逼乘桴。臂飲通殊俗。巢居自一隅。遺黎待螺蚌。小邑斷樵蘇。
絕域飛黃鵠。仙人用隻鳧。清秋已收潦。問爾麗泥塗。

馮當世生日

申甫維崧嶽。東方本歲星。舊書容盡信。成事況親聆。南紀浮江漢。青煒變項冥。氣和方毓粹。地勝已儲靈。
德宇何寥廓。斯文實典刑。龍駒來汗血。霜刃脫青萍。智略聯三捷。規模壯六經。羽翰驚海運。辰象屬天扃。
回首煙霄近。橫雲漢閣青。河圖開祕奧。龍節付儀形。萬里風聲肅。三年楚俗寧。里忙羞蟬棘。鄉校謹螟蛉。
聖主思霖雨。羣生望大庭。指期調鼎寶。洗眼頌椿齡。授易嘗占晉。論詩竊次騶。莫言狂簡士。足記景鐘銘。
陽月方開旦。商行接素秋。聲華臨盛際。勳業動前修。舊物詩兼禮。公望礪與舟。諫行扶廟算。威克弊邦讎。

翻欲危晁氏。皆能苦絳侯。孤城雖莫可。具美亦誰侑。北闕虛前事。南冠記昔遊。客惟論藥餌。書不號窮愁。迴有閒中趣。高於物外求。賓朋依白傅。潤澤借裴休。跂也身方族。時哉歲欲遄。愁無縮地術。賴有置書郵。理楫王猷拙。稱觴小陸優。傾心日夜急。滾滾大江流。

送子惇出使河北

禹績基壺口。堯仁被冀方。官迎赤車使。詔選瑣闥郎。力學推元稹。高才屬長康。壯懷來慷慨。得志自軒昂。愛直容知默。中和異吐剛。一臺傳駁議。二府見分章。前效平原淺。嚴威夏日長。居常祇逢掖。試躍卽干將。雲漢召回地。鵷鸞八九行。穹廬休夕拜。輶轡備晨裝。洛水成滔陸。流庸頗異鄉。挂冠勞畚鍤。佩犢問耕桑。哺乳增飢粥。完膚滌疥瘡。朴忠將漕最。醇厚訓兵強。冀馬羅馳傳。河魚飽食飭。細書夸睇視。淳酎沃煩腸。肯作田園計。寧嫌鬢髮蒼。能令老者奮。直與大鵬翔。處世當何語。懷君豈易忘。哂由終所畏。與點自知狂。

卜居書懷

漆雕未能信。陽甫免歸居。理以逍遙得。材由濩落踈。狹才輕勢利。小隱幸林廬。藿食由來事。茅茨不願餘。南簷容曝日。側徑喜攜鋤。筋力吾如此。功名世有諸。憶初千萬乘。徒步謁公車。投射東堂策。歸來北闕書。先鳴煩指日。弱羽愧吹嘘。雲雨非人力。泥塗亦詔除。江湖輕乘鴈。鐘鼓陋鷄鵠。有道翻羞卷。迷津幸遂初。幽棲謝車馬。至樂狎樵漁。述作稱狂簡。誰能問起予。

渭水

鳥鼠流清渭。岍岐導衆山。懸車循暗谷。斷棧出重關。長路去未已。連峯深更艱。秋高木落外。天處鳥飛間。日出看羣動。煙收認百蠻。別腸逾九絕。愁淚獨長潛。立志薄軒冕。隱居宜草菅。自甘家食薄。還愛綵衣斑。從吏負夙願。辭親何厚顏。簡書今可畏。幕府尙餘閒。猿叫無勞思。鴻冥不易攀。歸來城闕望。但見白雲還。致齋中太一宮。見屏風有唐賢和常舍人詩。因次韻寄子瞻內翰。子由侍郎。子開舍人。穆父待制。

數公皆嘗祠太一也。

禁掖下祠宮。青槐輦道通。薄雲收霽雨。初夏接薰風。將旦羣陰伏。齋居百慮空。夢遊如有遇。反聽更能聰。祕祝寧神外。多儀拜祝中。佐靈猶五帝。執事本三宮。象海鼇山峻。翻堦藥秀紅。守儒嚴講幄。起草麗談叢。夙昔嬉遊並。神仙步武同。吹藜驚燭火。抱法想江楓。已老仍書癖。懷賢愧易東。君王問無擇。留意屬谿工。

羽林通孝經

聖治周方域。儒風暨羽林。一經嚴授業。五孝得潛心。騎獵宸遊簡。嚴廬禁掖深。披文知行在。卽事亦官箴。訓勇寧慙晉。專門詎屬參。從茲六郡俗。不羨滿籛金。

寄杭州通判蘇子瞻海州使君孫巨源

〔原註〕時罷泰州通判

潮水三江外。胸山百郡東。專城須聞望。半刺亦才雄。浪海元無際。吳潮近峽中。茵憑那獨異。翰墨自兼工。追昔賢良舉。殊時步武同。百篇傳冠古。半策已全功。咫尺騰霄使。回旋著籍通。龍媒流汗血。鳳羽雜鳬翁。烈士猶難進。清朝各願忠。伏蒲寧曲學。鳴鼓尙深攻。物理安圓鑒。人倫陋發蒙。俟河愁敝箴。破膽忤豐隆。

力擠膠西相。廉欺第五公。絕絃迷促軫。折翼創虛弓。臥閣寧多病。治中有舊風。從容付丞史。咻噢及兒童。使者誅求急。王人禮數崇。湯年偏一概。稷御不終窮。高宴延仙伯。閒遊歷梵宮。怒濤翻練白。浴日上霞紅。沙鮒能藏蟹。江鳧不慕鴻。五雲瞻碣石。七澤望青楓。瓜戍留麋嘆。〔原註〕音軟。漢書作唆誤。茅心憶桂叢。賜環聊袞袞。遺櫟漫忡忡。困學今將落。生涯祇屢空。頭風吹過雨。鬢雪亂飛蓬。龜死寧遺策。鸞棲豈願籠。勞生俱夢寐。有道或瘖聾。絕唱常難和。幽光更待融。知君懷感慨。不獨寄絲桐。

寄梅聖俞江鄰幾韓持國

直諒多聞友。衣冠領袖賢。平生三逕樂。少別四時遷。曲策春山祕。絃歌壁水圓。吳門真養性。委吏故依然。杖履兼閭里。詩文孰後先。風雲多變態。鞭弭屢周旋。清汝流無極。維嵩地少偏。微官非擇取。勝事偶陳前。遲日消基局。殘春賴醉眠。時從謝客詠。不廢遠公禪。吏課輕涓露。官箴恨縹緲。裹糧嗟不遂。回首鎮幽捐。

寄王子直謝師宰

自昔東南美。由來王謝郎。提衡俱射策。繼踵事專場。凡馬驚騏驥。羣蜚下鳳凰。同時冠後進。舉國誦成章。賈子諸王服。蕭生舊友光。青冥看咫尺。雲路更翱翔。

游東寺

籃輿出乘興。佳客不相遺。水色鳴驕外。林光倚蓋時。寒餘草初變。風煦柳先知。複閣披襟久。迴廊步履遲。招提應不厭。幽熱重前期。會待花如霰。壺觴約自隨。

江漢

江漢緊常武。苗民僉舞階。百蠻時暴桀。終古事威懷。壤穴深潛蟻。山林盛鬪豺。墮鳶愁瘴霧。吹蠱厭昏霾。淫毒皆沙蜮。跳梁自井蛙。幾成分服嶺。垂欲罷朱崖。元帥全軍出。天王太室齋。鑿門資感奮。負羽必誰差。壯氣隨霆擊。先聲甚雨偕。遊魂蚩爾輩。賈勇泊吾儕。略野窮飛鳥。圍城盡析骸。饑啼兒宛轉。怨哭鬼歐哇。破竹餘銛刃。焚原祇亂稽。鯨掀才足膾。狸搢可須埋。王略過銅柱。天威暢藁街。斗牛光更潤。溟海靜無涯。賈舶盈珠琲。宮娥賤玳釵。拜侯金篆斗。犒士酒如淮。神武千齡協。歡娛萬國諧。告成方歷吉。名嶽望禋柴。

溫湯和王法曹

火井傳夷檄。炎洲記海隅。仙遊空詣絕。方志每多誣。汎濫浮清沼。淵源自奧區。洪鈞從鼓橐。一氣審爲爐。烈焰方焚澤。騰波盛濺珠。沃焦難與並。執熱諒誰須。鼉抃終當釣。鯨掀會學屠。此中勝鼎鼐。不復待樵蘇。池館他年貴。衣冠萬乘俱。廢興仍在目。惆悵指平蕪。

蔡州城枕汝水。寒日水涸。清淺可愛。原父與郡守汎舟川上。甚有佳境。以書垂報。緬想勝遊。因形短什。

積水寒收潦。深淵淨見沙。冷光憐玉潔。清鑒絕毫差。鷗鳥居相樂。漁樵近有家。濟川新剡木。載石去乘槎。樹影魚鱗密。城陰瓠子斜。夤緣忘向背。頃刻變烟霞。練白翻雲葉。金鎔蕩日華。照心同不隱。滌慮愛無邪。客醉風吹酒。歸迷斗轉車。林宗昔無暇。范蠡去空賒。鳬鴈晴餘喜。波瀾雪後佳。謝塘芳草夢。依約向無涯。

登東山小魯

（原闕十八行，每行廿一字。）

集英殿觀先帝御容

墮淚不能禁，彤庭北望深。壽觴疑在眼，宮漏獨驚心。
繪事應神助，天光想下臨。秋毫分萬一，玉色辨侵尋。
未悟攀髯遠，如聞棄屣音。當時萬年木，風動亦蕭森。

王四十監鴻慶宮

沛邑祠原廟，明年啓壽宮。眞遊追柱史，吏隱卽冥鴻。
苑路連修竹，兒歌習大風。海鳧隨步武，笙鶴下虛空。
司馬官園令，千秋擢寢中。書成大人賦，夢識白頭翁。
北闕縻徐樂，丹砂愧葛洪。帝鄉那可問，相望五雲東。

代魏秀才和

明府敏爲政，經綸功已深。無欺禮神意，不擾愛民心。
直道容多梗，良時避孔壬。未成宣室召，空賜潁川金。
茲日量天聽，方春報雨霖。望峴舒黯黯，笑電趣泔泔。
耒耜謹南畝，歌謠變越吟。和應光燕戶，潤足俟薰琴。
久客羞王粲，忘饑學漢陰。鹿門那忍去，留釣此江潯。

又和魏秀才

川原惟漢廣，雷雨向春深。望望三農事，悠悠一歲心。
月離初候畢，龍見亦推壬。向夕風翻海，中天電爍金。
農占不騎晦，史例足書霖。至治無饑穰，元和蔑旱涔。
遷鸚殊自喜，倦客獨悲吟。未必魚生釜，聊因酒貰琴。

奮身從嫖姚。走馬過雕陰。辜負封侯骨。棲遲河水漣。

答吳侍郎寄陝府

天王相有三分陝。按殺函。列國依明德。西人盛美談。甘棠元聽訟。綵服自調甘。餘力斯文貴。珍詞萬象含。氣清融渤澥。材絕聳榱桷。請誦詩三百。先知學召南。

次韻和韓持國雪二十韻

層雲升蒼莽。密雪亂高低。巧緻欺工倖。繁多感計倪。因高宜嶽鎮。善下及塗泥。海變方朝若。天通憶命黎。懸簷垂齟齬。投隙置刀圭。冥項豪無賴。娥舒弱易迷。清心還自照。正色故思齊。報曙端成誤。驚春妄問奚。林珍翔鷺鵠。玉氣墮虹蜺。獵野甘燔兔。登川快臞蠅。風回飄柳絮。日暝亂醯雞。蟲篆初難辨。庖羔久未刲。冥鴻愁徑度。饑雀愴單棲。律驗知陽復。天旋測氣躋。浮生共羈旅。外境本筌蹄。置酒容高會。論文慰解攜。詩從載塗唱。賦爲騁妍題。數聽波濤辨。滔滔百仞溪。

詠雪

朔雪三冬暮。同雲萬里間。昊天還質素。長路失幽艱。舞急低仍舉。吹多去復還。增高元稍稍。投隙故閒閒。積鹵輸鹽浦。飄沙聚玉關。怒濤狂振海。疊嶽坐移山。喜厚猶多積。憎繁詎得刪。旗旛高卷野。塵壒密通關。點綴林芳亂。裝褫石藓斑。戶斜遺尺劍。窗缺置連環。圭壁衣裳會。閭閻米粟頒。折筭終不屈。喬樹頓堪攀。執潔裁歌扇。珈明聳髻鬟。運籌思巧歷。語異叱神姦。凍筆無由捉。強弓不易彎。雁號隨雀替。龍蟄並魚鰥。